

ULANGTAHUN PEMUDA BESAR2AN

KUALA LUMPUR, Isnin — Pergerakan Pemuda UMNO Malaysia akan menyanjung ulangtahun ke 25 secara besar-besaran 30 Ogos depan.

Acara menarik ialah mengenang semula perjuangan UMNO, khasnya Pergerakan Pemuda, dalam mencapai dan

memenuhi kemerdekaan, diatur sejajar dengan temanya, 'Pemuda Penyambung Pimpinan'.

Upacara Jubli Perak Pergerakan itu adalah juga sebahagian dari perayaan Hari Kemerdekaan.

Ketua Pergerakan Pemuda UMNO Malaysia, Datuk Haji Suhaimi bin Datuk Haji Kamaruddin berkata,

Perdana Menteri, Datuk Seri Dr. Mahathir Mohamad dan Timbalannya, Datuk Musa Hitam akan turut hadir di malam perayaan selama tiga jam tanpa berhenti di hadapan Bangunan Sultan Abdul Samad di sini.

Pergerakan Pemuda juga menjemput tokoh-tokoh perjuangan penting termasuk bekas Perdana Menteri, Tunku Abdul Rahman, bekas Yang Dipertua Negeri Pulau

Pinang, Tun Sardon Jubir, bekas Menteri Kewangan, Tun Siew Sin serta lain-lain pemimpin yang berjuang ke arah kemerdekaan.

Suara Tunku Abdul Rahman yang bergema pada 31 Ogos 1957 lalu akan dirakamkan semula dan mendahului pekitan 'Merdeka, Merdeka' dari orang ramai yang hadir.

Sejarah

Datuk Haji Suhaimi berkata, kira-kira 1,500 peserta, kebanyakannya ahli Pergerakan Pemuda UMNO dari seluruh negara, akan mengambil bahagian dalam persembahan bersejarah itu.

Persembahan beraneka warna yang diselang-seli dengan tarian dan nyanyian itu, akan juga disaksikan oleh pemimpin-pemimpin politik negara.

Tepat jam 12.00 tengahmalam, upacara menaikkan bendera Persekutuan Tanah Melayu akan dijalankan sementara satu bendera 'simbolik' akan diturunkan, mengingati peristiwa lampau.

Datuk Tahir Majid yang melakukan tugas yang sama 25 tahun lalu, akan melakukannya sekali lagi di malam tersebut sementara rakannya ketika itu, Allahyarham Hamzah Alang, akan dicari pengantinya.

Datuk Haji Suhaimi berkata, acara akan bermula dengan lagu rasmi Pemuda UMNO yang disampaikan oleh kira-kira 200 Pemuda UMNO Wilayah Persekutuan kira-kira jam 9.00 malam.

Ini diikuti pula dengan persembahan dikir barat, ghazal, rangkaian tarian, dondang, sayang, boria, nasyid, lawak jenaka dan nyanyian.

Tepat jam 10.40 malam, satu taridra 'Mahsuri' akan dipersembahkan oleh Persatuan Kebudayaan ITM (PESKA).

Pada jam 11.15 malam, tabu yang mengisahkan tentang perjuangan kemerdekaan akan dipersembahkan.

Datuk Haji Suhaimi berkata, perayaan tersebut disambut agak besar memandangkan Pergerakan tidak sanggup melepaskan saat penting itu.

Sekiranya, ia tidak dirayakan tahun ini, bermakna terpaksa menunggu perayaan Jubli Emas, 25 tahun lagi.

Beliau juga berharap orang ramai akan datang menyaksikan pertunjukan tersebut.

Tidak ada bayaran dikenakan.

No. Siri 2908
No. Penerimaan 652/85